

摘藻堂四庫全書薈要

集部

欽定四庫全書薈要

集部

玩齋集卷二

三



欽定四庫全書薈要卷一萬六千五百十一

集部

玩齋集卷二

元 貢師泰 撰

七言古詩

題伊尹耕莘圖

碧海晝沸白日淪禹鼎欲徙湯網仁長繩短筌行蹙躐
驅牛獨耕莘野雪有時仰面一長吁青天漫漫風烈烈
身居畎畝堯舜心忍看民生墮昏沉乾坤闔闢係出處



幡然起作商家霖先農有詩亦有譜後世南陽詠梁父

段節婦吟

河可塞山可移志不可奪義不可虧妾為段家婦年紀
方及笄上堂奉翁姑入室携兩兒兒死夫亦死此生將
何為昔如雙鴛鴦今日為孤雌昔如三春花今日成枯
枝寒風吹短髮明月照空帷百年在世能幾時父兮母
兮不我知青天在上將誰欺

金谿縣葛烈女廟

金谿廟前草離離金谿廟中兩女兒青山猶似舊時色
流水不盡行人悲翠翹珠珥垂孔雀廟門深鎖藤花落
靈風蕭颯半空來髣髴音容啓珠箔憶昔里中初賦銀
銀賦日急家日貧父身傍掠痛欲絕女心憤結何由伸
鬼狐夜號天漆黑大冶騰騰火光烈可憐踴躍雙蛾眉
變作兼金白如雪君不見緹縈上書更肉刑木蘭遠赴
可汗兵固知才畧過男子不如孝女英烈能捐生又不
見湘妃江邊淚斑竹韓憑冢上連理木固知精誠可相

召不如孝女感化獨神速赤龍並駕參嬋娟萬古日月
懸中天人生雖死名不死吁嗟丈夫應愧爾

送國字張教授

九鳥彈羽鰲斷足六龍飛光晝相逐何人造書泄機巧
夜夜天陰聞鬼哭岐山鳳遠科斗空戈鳥爰蟲漸湮伏
太史方垂鼎足金丞相已變釵頭玉下邳拘囚死復生
三千晚奏雲陽獄自從毛錐擅楷法今古紛紛踵遺躅
天生真人起北方吏遣浮圖出身毒六書垂世盡諧聲

八體彌文貴句曲黃鍾大呂徒協和鐵畫銀鈎謾摹錄
大音直與造化同陰翕陽舒驗疏數先生典教元非輕
直使昌言被殊俗歸來繫馬在堂堦莫厭微官就羈束
人生得志亦有時萬里晴天竚黃鵠

黃河行

黃河水水闊無邊深無底其來不知幾萬里或云崑崙
之山出西紀元氣融結自茲始地維崩今天柱折於是
橫奔逆激日夜流不已九功歌成四載止黃熊化作蒼

龍尾雙鉸鑿斷海門開
兩鄂嶄嶄尚中峙盤渦盪激回
湍衝射懸崖飛沙斷岸決石瞬息而爭靡
洪濤巨浪相喧礧怒聲不住從天來
初如兩軍戰方合飛礮忽下堅壁摧
又如豐隆起行雨鞭笞鐵騎驅奔雷
半空澎湃落銀屋勢連渤海吞淮瀆
天吳九首兮魑魅獨足潛潭雨過老蛟吟
明月夜照鮪人哭扁舟側掛帆一幅滿耳蕭蕭
鳥飛速徐邳千里半日程轉盼青山小如粟
吁嗟雄哉其水一石其泥數斗滔滔汨汨兮同宇宙之悠久汎

中流以擊楫兮召羣僊而揮手好風兮東來酹河伯兮
盃酒

送高麗李衆甫員外稼

三韓山前春草綠柘枝連村桑滿谷大牛飯罷澣雙角
小犢跳梁野如鹿夜來東原雨新足九扈向人催布穀
畫省郎官朱兩轂歸佐明王理藩服土膏初起如雪沃
淺種深耕貴勻熟豈獨身化殊俗要使扶餘皆菽粟
新亭翼翼滄海濱手持酒肉親撫循鳴箏擊鼓更吹豳

大田多黍高過人車載輦負聲麟麟甌婁汙邪錯雜陳
露處有積居有困鬱金煮酒味已醇葵羹香飯調酸辛
句驪唱歌田畯神我有魚炙供嘉賓醉來歌帽吏迭舞
韓娥拍手山月吐

為郭宗道祭酒題韓滉移居圖

田夫生長田間住辛苦移家向何處老牛帶犢驢引駒
婦姑騎過前村去牽衣裹兒囊在肩瓠壺瓦缶縣蒲韉
一童鬢髻隨左右兩髯偃偻相後先新來茆屋徒四壁

東鄰西鄰不相識種田未了主家租又恐官司着差役
唐朝宰相韓晉公念爾流離多困窮當時落筆豈無意
正欲廊廟知民風願得轉徙安居室周公亦曾作無逸
分題得蕪湖月送宋顯夫赴山南僉憲

蕪湖月碧天無風江似雪與君迢遞行相隨一似都門
別時節揚州覓得賣鹽船夜來泊向噪磯邊磯邊潮平
人語靜但見一鏡當空懸君心明白有如此光照荊州
幾千里郡曹隔岼俟新官識得繡衣前御史山南父老

金方口力
卷二
來勸酒前日清光還在手

分題得姑蘇臺送吳元振赴江浙省左丞

姑蘇城外江水綠姑蘇臺是吳王築吳王燕罷越王來
館娃夜冷宮門開落花飛去春無迹江邊却起姑蘇驛
馬頭旌節何皇皇候吏傳呼謁道傍孤山梅白堤柳黃
相君入坐中書堂

為紹興和爾治中題畫魚

大魚跳波長數尺三十六鱗如列戟江湖淡蕩起烟雲

宇宙蒼茫變朝夕，子英方騎一角蒼琴高。
忽跨雙尾赤，中堂展玩風驟起，猶恐神光化空碧。

雪後會飲瑞應宮

蓬萊僊人厭煩熱，掃盡炎埃為玉屑。
乾坤混養寂無聲，宇宙模糊氣方結。
初裁六出學春嬌，漸疊重花妬霜烈。
陰風忽起勢欲攪，今日全遮凍纔徹。
千門落絮亂棲鴉，萬樹梨花噤啼鴉。
穿簾入幕自纖妍，積戶堆牕更澄澈。
時從壁隙印尖斜，還向庭隅補虧缺。
篆文一一寄鵝羣。

縞帶雙雙繞車轍重湖翻捲浪崔嵬曠野平堆山巖嶂
高屋風吹盡日寒中堂月照通宵潔珊瑚色變琪樹開
琅玕光射瓊芽茁薄如鋪簟厚如茵園者為環斷者玦
亭臺蝶化亂翩翩巖洞獅成爭噬嚙党家金帳謾麗豪
王子扁舟正奇絕始疑瑤池會王母羽蓋雲輶擁旌節
又疑廣寒會羣姝徧舞霓裳樂將闌幕中武君真可人
載酒滿船邀我別東蒙道士號疏放頭戴七星衣似鐵
昨朝呼我山上飲錯認梅花醉中折今晨又請出西門

有似生駒脫羈紲龍團旋試坐盤桓鶴氅輕披行蹙躓
須臾燭龍飛太空萬家冰柱懸玲瓏願將和氣先貧窮
為歌幽雅祈年豐

寄聶高空隱居

盱江之水深且清朝流暮流繞盱城城頭多青山羅列
如旗旌高空先生澹無營有園數畝屋數楹前當闌闔
後林麓不種桃花種松竹竹高十丈松百圍還來照我
軒牕綠先生黑髮今白頭坐閱七十春與秋架上書可

觀床頭酒可筭或巾車兮遠邁或散策兮近遊麻姑壇
前蓮變色華子岡頭月如玦朝來兩僊人為我留秘訣
石室探青霞砂床拾紅雪長生大道無他求要知富貴
如雲浮千鍾粟萬戶侯飄忽真成水上漚鳳凰不來黃
鶴舉只今誰與先生侶盱江江上一釣絲好共閒鷗作
賓主

題山水圖

前山後山雲亂起山脚入溪清見底溪南更有山外山

散如浮塵聚如米老楓枯櫟葉紛紛下有人家深閉門
釣絲欲收風浪急却回雙艇來離根老翁曳杖行偃僂
一童負樵一童斧筆端意度盡神妙卷裏衣冠自淳古
商周寂寞經幾秦後來莘渭寧無人茫茫耕釣去不已
武陵竟隔桃花春

題江陰丘文中山水圖

老龍渴飲池中墨飛上半天成崩岌雲烟著地凝不開
白晝神驅太陰黑筆端巧奪造化功咫尺峰巒千萬重

長林侶洒楓葉雨虛亭不動松花風隔江更有山無數
江上扁舟纔半渡他年白髮許重來為君別寫容城賦

題太醫宋居仁萬竹軒

文江江上萬竿竹日莫天寒森似玉僊人竹間結茅屋
牕戶蕭蕭護深綠天風忽捲簾簾谷坐看琅玕怒相觸
蒼龍起舞青鸞宿髣髴雲霄度僊曲山中伊誰伴幽獨
此君何人真不俗杖策東林復西麓千載風流一時足
黃金鼎煉丹砂熟白玉壺懸湛瓊醪野鹿啣芝虎收穀

長松吹花落棋局便當乞取長生錄月下吹簫弄漪淥
子虛道人歌

吾聞涉海有蓬萊登陸有天台攢峰與絕壁萬仞高崔
嵬翠屏白石掛飛瀑赤城丹霞駐空谷子虛道人位其
麓流水桃花繞茅屋問之不笑亦不言却向青雲借黃
鵠黃鵠兮無迹青雲兮何極崇真宮中晝日寒一瓢作
宇僅容膝吁嗟兮子虛抱道兮不居呼牛應牛馬應馬
謂僊非僊儒非儒不騎任公之碧驢不跨東海之生駒

不學汝南市上懸一壺又不學葉令朔望飛雙鳧紫丸
入口百病蘇邯鄲枉記石室書邇來年六十頭髮點漆
黑形輕類飀舉骨瘦如鶴立腰纏一百錢即去買酒喫
醉醒撐目忽大叫海天漫漫山月碧許由巢父呼不得
江南春水白鷗飛六幅新蒲向日歸

書河上成安驛

扁舟落日成安驛驛前危檣密如簣岸高浪急不得前
爭先進寸復退尺須臾纔定心稍安獨據胡床坐深夕

水邊燈影正晶熒陌上鈴聲還絡繹繞聽打鼓接官船
又見驅車送行客攬衣近前試問誰往來一日多數百
中原征需苦繁劇江南轉輸嚴督責況今使者類狼貪
水陸鮮肥隨口索致令編戶疲差役生計蕭條徒四壁
已將弱女納官錢更遣中男補丁額曩時河上幾人家
今日飄零竟無迹請君置此勿復言言罷空令愁思積
幾點殘星散空碧船頭別我東窗白

題太師贈長學士墨竹

墨池飛出雙鳳凰青霞碧雲搖日光九重阿閣幾十尺
如聽羽節飛鏘鏘集賢學士瀛洲客朝回拾得連城壁
便思手把釣魚竿萬里江南秋水碧

題陳仲明所藏雙松圖

六丁驅雷山石裂乖龍角鬪雙屈鐵太陰忽閃鱗中開
墨池翻濺吳江雪阿誰挽之茅屋東萬里不斷笙竽風
天台石橋俱謾爾坐中別有蓬萊宮

次赤城驛

老夫辭家今一月馬上行行過冬節山空野曠風栗烈
木皮三尺吹欲裂貂帽狐裘冷如鐵凝雲作雪還未雪
自是天公念駑劣上高下高隨小驥裹轡哦詩亦清絕
人生何苦事羈紲候吏來迎稍羅列入門登堂火微熱
須臾凍解通身熱

過浦城

浦城三百六十灘灘灘巨石鳴飛湍四山欲雨風亂起
霆驅雪迸驚晝寒青竹縛篷白木榜側坐敲眠任搖蕩

潭深墨墨蟠蛟螭壯士猶然懾精爽老夫平生疏且愚
安得涉險同坦途形如健鶻膽如虎此心只與青天孚
騰波寶劍今在不夜夜光芒燭牛斗

題楊元初理問送行詩卷

玉堂學士關西楊當時長策動四方九鼎一筆絲綸光
星斗錯落成文章白首作史誇三長書成石室金匱藏
翩然拂袖辭帝旁十年歸卧衡與湘妖狐黥鼠爭陸梁
芒角煌煌橫欖槍阿玄昔日焚香囊祇今馬上能挽強

虎皮裁鞍騎驢龍泉之劍百寶裝萬夫披靡同驅羊

既佐大將平武昌鏖殺袁賊走潯陽旌旗蔽日浮餘艍

大江東下孰敢當耀兵桐汭勢愈張吳興嘉禾稍聚糧

短衣一譟還錢唐軍門捷書報天子遼海雲帆日千里

宮牆馳道平似砥披圖畫奏天顏喜左轄之功近無比

賜以裘馬及弓矢錦袍文犀鞞珠履涼州葡萄甘且美

幙中元初名最韙黃金橫帶官作理海若率職波不起

百艘南還疾如駛吳山越山青靡靡大開中書聽宣旨

十萬甲兵齊拜跪
椎牛作炙膾頰鯉
一時光耀盛百禮
玉堂僊人元不死
吁嗟畫圖何所似
麟閣雲臺有如此

題二馬圖

鐵喙騶連錢
驄何年墜影江水中
蒲梢西來八尺龍
天閑十二為爾空
五花雲錦吹東風

楊白花

楊白花無定止
昨日宮中飛
今朝度江水
江水茫茫千萬里
綿輕雪薄春旖旎
把臂踏歌歌未已
石頭城邊風

亂起楊白花無定止

題上虞謝元公春暉堂

東海有母母有兒萬口一出稱孝慈兒在襁褓寒且飢
母雖不言心自知兒大讀書又讀詩贈以長劒遠從師
十年走客江水湄氣吞雲夢八九之星斗錯落文章奇
神駒如龍來月支真珠作轡金作羈追風掣電不受騎
便欲一蹴超天池天池瑤草淨如拭移得靈根種堂北
阿母升堂日五色照見舞衣華翠織寸心有恨恩無極

浩蕩春暉誰報得玉桃上壽兒侍側兒當作官五鼎食
白髮如斯應載黑此時方知教兒力文昌星高輝南國

學圃吟

江邊乞地學種蔬周遭步量弓百餘十日去耕十日耬
耕耬未畢僕已痛東家倩人不受呼西家倩人納官租
菜苗虫食且半枯昨朝許有今朝無出門抱甕空躊躇
南鄰老圃笑我迂共倚大樹立須臾手把一卷神農書
口稱此事焉可誣治土貴熟甕貴腴三犁兩耜工力俱

燥濕得所避亢於田不犖确堅已狃深畦淺壟畫成區
四分井字旁通渠瀏瀏野水翻渴烏然後種藝皆榮敷
寒暑按節順弗踰風和日媚雨露濡水崧山芥菠陵苾
韭黃薤白苾蒨蘇綠葵青藿華靚姝藻荇芹茆蘋繁蕪
瓜瓠芡藕苔筍蒲蔓菁蘆菰連根株牡丹芍藥萼重趺
茄房豆莢懸瓠壺紫薑紅蓼鬱雕胡玉延蹲鴟巧相扶
皮毛脫迸明月珠長頸短脰臙理膚冰漿雪液如凝酥
翠鱗銀甲虬髯鬚魁首肥顏施丹朱琅玕琥珀鈎珊瑚

鑷剔摘掇視密疎多盈筐箱少盈裾削剥淹漬役膳奴
甘脆鱸嫩薌味殊主真翼翼賓于于熟可羹毛生可咀
適口絕勝羞僊厨子欲學圃不早圖只今後時將何如
列鼎肉食稱鄙夫魚膾日厭葷與魚請子置之勿次且
褒衣博帶歸爾儒吾計子食當晨晡家園自足供所需
余嗤翁言亦何愚翁實勤苦少暇娛白鬚黑面形瘠癯
暎即胼胝汗輓轡勞即腰脰沒垢汙矧茲惡莖與苦荼
加以臭蒜雜穢萎邪蒿濁莧兼滑榆多食嘔泄神志瘡

得失往往如瑕瑜西伯愛歎垂聖謨太官專服國以墟
曾暫嗜棗宣尼徒亦有請學譏樊須孤竹採薇終餓殂
屈到好芟竟離居元亮隱菊多令譽諸葛立脩名豈虛
陶家蘧甌庾家菹黃金不聘蘇東湖是非榮辱理不渝
世間萬物皆乘除翁言固辨亦過諛鄰家有酒且共沽
醉酣仰面一長吁忽見黃鵠翔天衢

當塗李伯羽母夫人貞節詩

碧天夜落星如雪甲士長弓射孤月孤月照孤城千鈞

懸一髮娉婷女兒方及笄誓將死節愧當時頸血不污
春花枝夫家桑梓青陰垂生子伯仲好羽儀青山之名
天下知誰其作銘吳太史蛟龍筆底烟雲紫古來賢母
有如此

秦郵露筋廟

飛蛟撇天連白草落日荒原泣姑嫂嫂留旁舍姑獨行
花顏夜委長淮道亂聲鼓翅腹正飢利觜嗜膚血方飽
妾行豈不念辛苦死重如山生似羽欲識當年一寸心

廟前老樹啼春雨

吳中曲送楊伯幾南遊

鯉魚風起波紋綠
枯葭折蘼啼寒玉
榜聲催曉渡江心
驀聽吳娃舊時曲
楊郎年少輕別離
三尺光芒練帶垂
虎丘山頭候月出
靈巖洞口看雲飛
梅花雪點身上衣
慈母倚門聽馬歸

送左祥卿之香山縣尹

九星排玉雙門開
抱旗石鼓青嵬嵬
帝子城頭跨龍去

僊人海上騎羊來，禺南燕北天萬里。
五月河邊青雀起，鵬鵠膏暖射晴虹。
海月光寒炯明水，宓子琴中化易成。
吟得新詩字字清，馬立堦前待衙退。
刺桐花裏鷓鴣鳴，送王士鳳之龍泉縣北鄉巡檢

豹囊弦弓鳴鏑懸，白玉為玦鉤重弦。
雙魚倒勒躍如電，山人爭識將軍面。
將軍傳令出白斜，桴鼓無聲衆不譁。
前村草長黃犢飽，四封寂寂多桑麻。
三年最書還北向，當日賢侯在天上。
腰間寶劍重提携，新恩却賜龍泉歸。

送刁萬戶奏事回蜀

肉髯驕馬來青城朱英畫戟擁朝京
溪子二石霜月盈魚腸三尺秋水橫
九門洞開論五兵却賜龍章歸柳營
雄威纔發貔虎騰猛氣已使豺狼驚
杏花春雨別行旌兩玉舟深猩血盛
太白連雲萬里程夕陽到處聽鷗聲

送涇王府蒲司馬西還

重弓滿引鳴鏑和翻身躍馬渡長河
日高射獵王半醉軍中司馬功最多
白狼西來獻天子腰間玉龍鱗甲紫

寶書緘奏動宸京黃封御酒貺邊庭弦蒲汭鞠幾千里
芳草萋萋春似水鳥聲山色不勝情枚生作賦才堪比
送鄭伴讀歸省山東

綠烟曉發扶光遲畫橋鳴鴉度低枝郎君恰恰燕山歸
僊人笑迎兒女隨手攜松杖高過眉雙舟滿江堂上巵
五色戲着囊中衣香雪飄飄吐盤螭風吹雨脚沸朱絲
黃花醉飲秋正宜況今太平天子時

送張介臣伴讀歸省濟南

白天迷濛日脚消雪花散亂風飄蕭重裘着體如壓鐵
呼酒不來寒正驕東風足馬去千里仰視王屋當雲霄
到家方慰母心喜入門更聽兒啼嬌華燈夜照舞衣熱
髣髴鳴鳳和笙簫暗黃着柳垂長條虎闌春信趣還鑣
一林遲子城南橋

友人赴陝西作縣

角聲吹起滿城雪北風蕭蕭嘶小驥銀瓶細溜蒲萄熟
三疊歌殘人欲別長安西去山嵯峨野曠春濃詩思多

縣深花拂琴絲和小吏呼籌衙又過莫忘都門送時節
楊柳枝寒不堪折

輓陳堯

草廬吳先生門人也有俊才卒年十八其妻
亦痛哭而絕

乘舟沃酒魚口熱小袖萊衣雙鳳結春歸白玉不禁寒
雪兔西沈半山缺望夫化去孤石裂死與韓憑誓同穴
鬼狐寒食上新丘陰風自掃梨花雪

上元送別

越王城中燈火明
郎君早發越王城
春酒一壺歌一曲
楊柳風吹波面綠

關山月送殷文學還浙西

白波洶湧風初起
綠烟漸墮冰壺裏
林鳥沙鷗寒不棲
萬頃玻瓈浮如水
攬衣推戶仰視天
一寸鄉心幾千里
僕夫在門嚴戒程
宵人呼籌催罷更
街頭蕭蕭馬初過
城中商角雜亂鳴
嗟哉我亦天涯客
握手欲別難為情

遙憐後夜相思處
楓葉滄江一船輕

歸彥溫赴河西廉使

賀蘭山前河水西
金沙路平香草齊
繡衣玉節往問俗
驄馬顧影時驕嘶
當年長身多意氣
拔劍歌呼人半醉
只今太平七十年
盡把英豪化仁義
甘州枸杞紅玉重
涼州葡萄漿滿甕
九重有詔趨還朝
莫惜馳囊少分送

玩齋集卷二

欽定四庫全書薈要卷一萬六千五百十二

集部

玩齋集卷三

元 貢師泰 撰

五言律詩

冬至

子月先三正初陽動六虛氣從溫室候雲向曉臺書自
許心猶壯誰嗤髮已疎乾坤萬里客何計樂樵漁

太平三山值風

天塹東南地長江日夜流大風吹水立驟雨挾山浮浩
蕩掀黃鵠歌傾舞白鷗莫憐舟似葉此亦壯哉遊

蕪湖

昨日何處別今朝此地留青山逼岸起白水滿江流雨
隱巡鹽鼓風腥掛網舟何時歌歎乃同買綠簑遊

遊麻姑萬松庵

秋日訪招提雲深處處迷殿門松影直庭檻藥苗齊接
竹通流水編籬護野畦道人偏愛客留得樹頭梨

又

積雨變秋思清游愜道心過橋分履迹問寺逐鐘音紅
墮鳥爭果綠深魚占陰何當脫塵鞅重此契幽尋

贈方外閒人

白日青天外壺中別有春江湖萬里客宇宙一閒人採
藥雲歸袖看花月滿身何時重會面醉拂布袍塵

遊江陰君山

孤嶂臨滄海千山湧大江遠帆歸市獨高塔倒波雙鷗

鷺爭洲淑蛟龍怒石砭壯遊心未已飛雨灑樓牕

遊許墅龍華寺

偶到龍華寺因同半日留禪林將結夏客路尚如秋衆
樹綠偏靜一花紅更幽最憐高岸柳容易繫行舟

遊虎丘

海上地偏勝吳中山更奇畫圖雲洶湧冠佩石參差花
落談經坐苔封試劍池倚闌烟水濶千載一鷗夷

聽雨堂為周叔量賦

聽雨高堂上君家好弟兄樹深催暮色竹密助秋聲
列坐情方適連床夢屢驚却憐江海濶鴻雁每孤征

題韓與玉所藏春山行旅圖

乾坤春浩蕩江海日舒徐孤客千山騎雙童一篋書
桃花溪口渡松葉嶺頭居何日西湖上從君晚結廬

台州寄楊子秀

路轉千峰合溪通一帶斜飯炊黃渡雪酒染赤城霞
未訪僊人宅先尋博士家近聞歸隱處盡種碧桃花

興化湄洲島祠天妃還

清朝嚴典禮宣閣遣詞臣衣帶天邊雪花逢海上春稍
能更祀事亦足慰疲民萬里行方遠朝來更問津

又

夜宿吳山上朝行莆海東地偏元少雪天濶自多風不
見波濤險寧知造化功百年神女廟長護海霞紅

題程以文竹雨山房

山人愛種竹竹高上雲端屋近琅玕潤林深翡翠寒好

裁鳴鳳管莫截釣魚竿白髮相鄰處時時一問安

又

天上春雷起山中夜雨過林聲遙帶瀑池影淨生波對
坐此君獨迎門稚子多何時深翠裏擊節共長哦

梁山樂

涼雨忽飛過濕雲猶涌來渚花紅陣陣汀樹綠堆堆一
鶴搏空起雙鳬觸浪開梁山非舊俗禾黍滿高臺

東昌次孟景章韻

溪滑魚苔淺沙柔馬蘭長一鷗當水浴雙燕背人翔客
路頻看月征帆尚帶霜灣灣見花柳回首重思鄉

送陳子敬赴南昌尉

送君南作尉黃綬去翩翩縣倚邊江郡花迎上水船自
憐官主印人喜吏如僊定見雙鷗鷺飛來御史前

送國子伴讀張德貞歸湖南

薊北湖南路孤舟萬里程晴天黃鵠健春水白鷗輕芳
草歸時恨閒花別後情定知袍笏貴不似綵衣榮

南城監試和同院張進遠韻

清朝隆禮治僊館策賢良冠冕山河大文章日月光九
闕嚴虎豹千仞下鸞鳳此日橋門盛何論漢與唐

送李盤野

秋水芙蓉岸孤帆天上歸青山四面起白鴈數行飛里
父供新釀家人澣舊衣封侯定何事且理釣魚磯

題劉子明西雲亭

野樹偏宜晚江花欲變秋幌明霞散綺簾暗月沈鉤解

補青山闕還生白髮愁何時作霖雨却共水東流

送國子生哲德明歸淮西覲省

落日青山外西風白鴈邊幾人同飲酒一客自開船江
蟹經霜美淮魚出水鮮遙知到家日白髮語燈前

送華以愚南歸

禁城秋雨後柰此薄寒何江上書來少吳中客去多莫
帆依橘柚晨爨就蒲荷遙想歸榮處鄉人日醉過

分題得獲麟堆送李伯貞廉使往山東

正朔周王紀春秋魯國書瑞圖齊鳳鳥麟趾應闕睢絕
筆懷西狩揚鑣過舊墟泰山青萬古相對一躊躇

送僕元魯應奉代祠海嶽

天子臨丹宸祠官侍玉除香從中禁出祝遣北門書海
若通方貢山靈候使車青春隨處好六轡且徐徐

送蒙古彭教授往高州

萬里高州路憐君此日行藤陰頻駐馬榕葉亂啼鶯人
到烏蠻異官同博士清定知江海上殊俗盡諧聲

居庸關觀新寺

渡水復渡水上山重上山黃金鑄菩薩白玉凍潺湲數
騎朝還驛千夫夜守關帝城行欲近喜色動哀顏

將千嶺

絕頂低高斗重關壯北門隴雲浮地白谷水帶泥渾宇
宙神功大山河帝業尊小臣叨載筆華髮感深恩

赤城

山近雲連驛沙虛雪擁村瓠壺縣穀種土銚爨柴根凍

雀來依幔晨雞立傍門客中甘澹泊不必問盤飧

題黃觀瀾卷

碧天看不盡滄海去無邊氣涌風雷動光涵日月縣
奇文方浩瀚餘景尚漪漣好種珊瑚樹他年繫釣船

送趙宗吉赴河間太守

闕下聲名舊河間治化新一麾方到日五馬已行春
報最寬明主緘書慰老親何時鳳池上重與掌絲綸

題雪軒

白天陰欲合冷日景微遮風勁將飄絮春嬌且弄花照
牕冰柱直印几玉文斜試聽吾伊處山南有幾家

圓脩寺雨後書懷三首

長風動高樹疎雨落空庭傍几香烟白開簾草色青病
軀便倚杖老眼倦繙經為問新來鴈何時過敬亭

又

晨起坐堂上白髮亂如絲野鼠啣梨果山禽繞竹枝寸
心甘自許多病竟誰知賴有溪南友時時慰渴飢

又

開牕對脩竹日暮更深寒感慨情偏極棲遲淚不乾酒
醒驚絡繹衣薄怯闌干烽火何時息餘生得少安

和前韻

病多疏白墮心靜熟黃庭日暮藤蘿暗天寒橘柚青蝸
涎緣畫壁蛛網綴函經睡起成長歎浮生一草亭

又

眼花風瑟瑟心緒雨絲絲狡兔成三窟鷓鴣寄一枝青

雲慚故友白髮感新知最好南山石相看可樂飢

又

日移棋局晚山落酒杯寒欄蝶穿花濕牕禽飲硯乾夢
魂空宛句音問阻長干多病文園客秋來強自安

春晚書懷

東吳喪亂後消息竟何如日望平安信空傳報捷書壯
心徒感激老淚獨欷歔坐對垂楊晚行人江上疎

又

江黑雨將至水高潮正來花隨兩岸別鷗逐片帆開世
治逢多難吾生愧不才飄零添白髮見者莫驚猜

寄靜庵上人

細雨桐花晚微風麥氣秋王符偏好學宋玉不勝愁世
事同蕉鹿人心類棘猴何時虎溪上還共遠門遊

憶姪景

相望亦何遠夢中頻見之干戈連數歲書問動經時寂
寞揚雄賦飄零杜甫詩江東春樹綠偏重阿咸思

又

自汝南臺去棲遲兩見春鼓鼙江上月烽火海邊塵哀
病全非昔傳聞總不真近知更大將旗幟一時新

憶吳會草堂芭蕉寄汪仲恭

別後芭蕉樹青青定長成月移牕上影雨送枕邊聲愛
惜煩吾友飄零愧此生更需花實大同飲露華清

和馬仲臯立秋韻

酒盡青山莫書從白鴈過長風斷雨缺月掛明河故

國逢人少新秋到客多不知滄海上何日罷干戈

又

一向城東住荒涼客少過疾雷時送雨陋巷忽成河自
許丹心在誰嗤白髮多平生二三策可足勝橫戈

題朱質夫東楚草堂

幽人海昌住草屋向村墟擊竹頻呼鶴分泉謾種魚梨
花春巷冷榆葉夜牕虛細雨篝燈火匡床正讀書

題鄂屯秋江墨蹟

滄江渺何許歲晚正愁予密諫囊無橐閒吟卷有書青
天來鶯鶯秋水照芙蓉風致今誰似令人憶使車

贈李可度

當年丞相掾孤劍泊天涯白日懸心事青春老鬢華定
憐鴻有路終愧燕無家志士須聞道人情付落花

赴京道中

風雨新河口孤舟此日行送多親友義別見弟兄情路
識春山熟洲迷雪水生臨岐重回首一鴈起江城

茅市簡友人

顧我行方遠，憐君意倍親。
雪蓬依渡口，雨笠待河濱。
酒熟還留飲，詩成不厭貧。
相期重下馬，花柳隔年春。

贈張士方

昔年東海上，曾共繡衣行。
小吏啣冤久，分司用法平。
江沙清可數，海月晦還生。
陰德今誰似，于公有令名。

以拄杖贈程以文先生

海上枕榔樹，殷勤舉一枝。
功能扶正直，力可濟顛危。
文

玉膚生潤玄犀質換奇何時同野服江海遠相期

茂上人古木圖

老龍起聽法蛻骨在空山雲迴青天潤風來白日閒曲
身雖偃蹇直氣自孱顏株坐誰偏似禪歸晝掩關

鵬窩驛

鵬鷖入雲去空巖遺舊窩冷烟迎日少晴雪背陰多擾
擾羣鳥集蕭蕭數騎過此時孤館客歸思竟如何

洪棧驛

萬壑從東下羣峯向北圍牛車絙水去驢馱負薪歸隙
日斜窺戶尖風直透衣羈懷正無賴一鷄向南飛

王元吉蘿月山房

每愛城南宅空庭坐夜分陰垂青裊裊光漏白紛紛卷
幔飄花雨開尊度碧雲何時寧薜荔猿鶴與同羣

穀上人蒲室

上人蒲作室絕似睦州禪父母今誰養弟兄惟汝賢齊
房連紫竹佛座擁紅蓮明日長蘆去春江正拍天

許光遠先世讀書樓

高樓當海上有客正看書門對千峯暝闌回萬象虛榜
聲飛宿鳥燈影避潛魚留得題詩在諸孫更卜居

會稽韓道士滄洲

風雨四山至空江生早寒白鷗秋水黃鵠暮雲端杜
若人移棹蓬萊客倚闌何時分一曲同把釣魚竿


玩齋集卷三

謹案卷二五頁後七行和爾舊作虎兒今改後倣
此

卷三十頁前八行鄂屯舊作興屯今改

欽定四庫全書





總校官庶吉士

臣

張能照

校對官庶吉士

臣

曹錫齡

謄錄監生

臣

江軾

欽定四庫全書薈要

集部

玩齋集卷四



欽定四庫全書薈要卷一萬六千五百十三

集部

玩齋集卷四

元貢師泰撰

七言律詩

和石田馬學士殿試後韻

有序

丁卯歲學士與先君同為讀卷官在院倡和甚多此則放榜後所作韻也

春風馳道入宮牆青瑣深沈引夕郎
草染綠波生太液



花扶紅日上披香聲名已重千金壁恩寵方隆七寶牀
治世斯文今極盛九天星斗自成章

送賈有恒赴潞城縣令

上黨人參五葉齊郎君今日馬行西滿溪藍水魚初上
繞縣青山鶯亂啼小吏報籌衙欲退長官封印手還題
洛陽自古多才思好賦新詩寫赫蹏

送陳太祝使江浙收禮器樂書二首

天子齊明奉宗廟容臺祇飭備儀章雲雷出地雕彝鼎

日月懸天畫衣裳
駟騎晝停山木蔭
船牕風度水花涼
過家莫醉紅樓月上國迴驚欲禘嘗

六月樓船泛御河
太平樂譜自編摩
鳳鳴嶰谷曾吹律
馬出蒲梢更作歌
古尺要將諸部定
新聲還用四清和
器成早入神庭奏
人頌明時瑞應多

壽庫庫子山學士

上林春滿樹蒼蒼
別殿新頒外國香
龍虎風雲依日馭
斗牛河漢列天章
瀛洲勅賜黃金榜
學士名高白玉堂

千載太平今有在文昌高映紫微光

崇真宮醮罷勅畫吳宗師像

海日瞳矐照九衢靈旌霞旆擁高居尚方勅畫僊官像
中使傳宣學士書劍氣朝寒垂白練丹光夜暖出紅蕖
石壇醮罷清如水猶聽松陰起步虛

贈盧醫

豫章盧斌好遠遊落魄燕臺今白頭酒家不識藥都尉
女子迺知韓伯休天茄結實庭戶晚山藥作花籬落秋

投老欲歸尋舊隱忽騎孤鶴過揚州

畫馬

漢家旌節渡流沙奪得戎王鐵
啄駟天上白魚秋弄影
月中玄兔夜生花九圖妙入將軍筆
八駿神空阿母家
獨控奚官更超絕長楸錦隊謾如霞

送黎兵胡萬戶南還

將軍仗策去安邊詔下東南萬里天
雲海旌麾趨玉帳
春江鼓角載樓船
黎人滿溜檳榔水
蜚戶齊分牡蠣田

遙想軍中無一事坐驅千騎獵平川

送陶翁歸豫章

秋雨初晴櫂桹香蟹紅魚白憶江鄉十年客枕雞聲月
千里歸帆鴈背霜入室親朋羅酒饌上堂兒女挽衣裳
逢人莫說京華事漢署今無白髮郎

費秀才進所著春秋歸

雲滿青山雪滿頭一生辛苦著春秋抱書不向公車獻
遣使須煩謁者求翁子行年當富貴虞卿終老豈窮愁

玉杯繁露應非舊更請先生為校讐

送壽弘毅應奉赴興國路經歷

院門深鎖落松花東接蓬萊小海斜絳蠟夜深催視草
紫泥春早聽宣麻鳳凰池上人辭直鴻鴈江南客過家
幙府秋來清似水吟詩應對白鷗沙

次泗安光上人韻是日聞有供奉之除

水氣朝寒生白烟寺前楊柳繫吳船佛燈紅映流蘇座
僧榻青裁海艾氊書報誤叨金馬召厨空應愧木魚懸

定知別後相思處楓葉蘆花宛句邊

天壽節日大明宮朝罷口占東張約中博士

金門珠箔轉迴廊文武分班有舊章花露重沾腰珮濕
松風輕度鬢絲涼仗隨騏驎通朝貢杯進夔龍祝壽康
最喜太常張博士清標如雪照鵷行

江浙獻嘉禾賀丞相多公

玉燭金穰屬化鈞九農和氣洽深仁靈根獨占山河秀
顆粒先迴宇宙春天上畫圖方入貢江南簫鼓正迎神

作書願紀成周治慚愧無才備史臣

南城試院和張仲舉博士

紅燭搖光坐夜分
學宮魚鑰鎖重門
歸心已逐南湖鴈
壯志空慚北海鯤
傍几香添霜漸冷
隔簾燈過月微昏
校文歸向西曹日
會送夔龍謁至尊

送林希元應奉赴上虞縣尹

居庸雪消河水深
南行賴有買舟金
相如多病因能賦
東野長貧為苦吟
已許姓名辭鳳闕
更傳聲價到雞林

白頭作縣臨東海誰識先生去住心

送余廷季赴海東僉憲

綠髮相從白髮生都門握手倍多情
論文豈少新朋友對酒何如老弟兄
玉節繡衣江上騎苑花宮柳日邊鶯
使星一夜移東海定遣文章到兩京

試院和周伯溫待制韻

羣僊盛集瀛洲館丹鼎芙蓉徹夜開
斗下璿魁聯外府坐間珠唾落中台
黃封酒醉賓筵散絳蠟紗籠佩馬迴

禮樂光華當此日九重側席正需才

送蘇伯脩侍郎赴淮東廉使

黃金臺上受新恩還向長楊謁至尊行殿曉寒頒玉節
驛亭春暖簇朱轡青蒲葉短烟波闊黃柳枝長雪水渾
別後新詩好相寄廣陵冠蓋接都門

送吏部郎中王可表出守棣州

別殿春深奏選歸雙旌新賜出王畿齊東山水開船近
天上星辰聽履稀竹馬總來迎使節金魚猶似掛朝衣

遙知最政還車日定草封章謁紫薇

題張真人父一間堂

真人騎鶴下蓬萊詔許諸孫次第來玉佩春隨黃道轉
綠章夜並紫雲開香分別殿傳中使書賜名山映上台
還向僊都拜家慶碧桃千樹擁霞杯

送周舍人赴山南宣慰司照磨

紫衣袖窄金圍重花底傳呼出殿遲欲向新年開幕府
還思舊日進朝儀雪寒淮水魚方出歲晚江陵橘尚垂

料得中朝盡知己重來應是不多時

送篤敬夫赴南臺御史

御街初日柳梢紅
鴈角新冠出禁中
天上使華恩詔密
江南民瘼奏書通
九霄風送孤飛鶚
萬里雲隨一騎驄
欲把真心酬聖主
青松多種石臺東

題四川張萬戶夫人貞節卷

白帝樓前巷陌深
將軍旌旆正沉沉
玉簫聲斷孤鸞曲
綠綺絃空別鶴吟
豈是人生輕一羽
要知妾死重千金

春風冢上連枝樹只有韓憑會此心

贈僊居散人

青山四面玉嵯峨中有山人隱薜蘿
細雨閒門芳草滿微風深澗落花多
童窺丹竈時驚鶴客寫黃庭欲換鵝
我亦平生愛疏散春來應許謝朝珂

送道士王仲遠還江州玄妙觀就東李子威太

守

羽節參差佩陸離蓬萊坊裏日偏遲
花邊奏簡雙鸞至

松下携琴一鶴隨
白日常過燕市飯
青春忽動庾樓思
江州太守吾知己
為說年來鬢已絲

送大都路陳學錄使往江浙造祭器雅樂

世祖投戈事邊豆
素王宮殿在南城
百年禮樂當今日
一代文華寄此行
潞水朝寒初過鴈
浙江春晚尚啼鶯
還鄉莫為萼鱸滯
祀典由來重兩京

送呂師賢赴山北憲史

白月微沈曙色紅
憐君書劍別匆匆
臺高日望群鳥北

海闊雲隨一鶴東
俗古尚遺箕子教
官清還慕伯夷風
遙知六轡巡行處
馬上看山日日同

送東流葉縣尹

江流東下縣南遷
一簇人烟野岸邊
荻笋洲青鷗鳥狎
楊花浪白鱗魚鮮
印來聚吏排衙鼓
社到隨民出俸錢
應是繡衣行部處
攔街齊頌長官賢

壽吳宗師

帝遣真僊位上卿
五城迢遞接蓬瀛
雲浮紫氣旌幢潤

日射紅光劍佩明
池館晝閒放鶴舞
江湖歲晚結鷗盟
軒轅曾訪長生術
應信崆峒有廣成

贈毛李祥還江南

白面書生江漢客
幾年琴劍落京華
聞雞曾度居庸雪
立馬還看上苑花
楊柳枝長方去國
蘼蕪葉短已還家
遙知綵袖娛親處
酒暈微生兩臉霞

送臺典張子誠辟山北憲史

芙蓉幙府清如水
愛子新來意氣多
天近烏臺依執法

風清黃閣聽鳴珂燕山北望千峰盡遼海東迴一騎過
刀筆曾為漢丞相起家應不愧蕭何

送安南使者黎括省之

四海光華明主德萬方奔走遠臣心來依北斗朝閭闔
歸逐南流過鬱林椰子酒酣歌蹋蹋刺桐花落馬駸駸
遙知下國郊迎日首啟金函播玉音

送舒亦誠南歸

芳草生庭履跡稀棠梨花落燕交飛題詩忽報客將去

出戶却知春已歸
天上雲開黃鵠健
江南水長白魚肥
人生最是閒中樂
早晚相從賦式微

送黃子中南還

雪風吹寒春尚遲
暗黃恰上楊柳枝
東門立馬旋沽酒
南浦停舟還賦詩
去路間關須約伴
到家歡喜總忘疲
相如自是多才思
未必閒居兩鬢絲

廣微天師祈雪有應詩以美之

九枝鐙照碧壇空
龍虎旗高滿殿風
綠簡夜深朝玉陛

素幢春淺拂珠宮一天凍色星河合萬里冰華陸海同
明日內家應錫宴綵符爭取綴釵蟲

送王彬叔赴淮西憲史

黃金築臺高嵯峨抱犢憐君日日過丹鳳卿書辭冀闕
白魚供酒過淮河京華遠去交游少幙府新來贊畫多
料得聲名從此起分司行處聽民歌

送連子奇歸隱贛州

薊門風冷白鵝來萬里孤舟一日開去路定過彭澤縣

到家重上鬱孤臺
煮茶林下收黃葉
理釣磯邊掃綠苔
太史明朝占處士
少微依舊傍三台

送馬叔敬赴江西醫學提舉

柳花飛盡綠陰多
萬里歸船發御河
自歎官閒無客到
却憐君去有誰過
丹成海上收瑤草
酒熟江南醉碧荷
何日定將醫國手
為民談笑起沈疴

送黃季亨赴永嘉松山巡檢

萬里船開直到門
江南楊柳雪紛紛
馬前士卒爭誇武

坐上將軍喜論文夜月村深宜紡績春風梅熟稱耕耘
舊時逸少曾遊處綠水青山帶夕曛

題河間榮溥孝義堂

溥嘗事治散丞相既被罪客皆散溥獨收尸以
葬後又白其寃得復封爵今溥官亦至四品云
丞相門前客如市一落陷阱烟塵空解衣哭尸壯士志
吞炭報主前人風氣摧青山作平地精貫白日成長虹
當時富貴不復見惟有節義垂無窮

上都詐馬大燕

紫雲扶日上璇題萬騎來朝隊仗齊
織翠轡長攢孔雀鏤金鞍重嵌文犀
行迎御輦爭先避立近天墀不敢嘶
十二街頭人聚看傳言丞相過沙堤

樓閣別殿擁僊曹寶蓋沈沈御座高
丹鳳啣珠裝騶裊玉龍蟠甕注葡萄
百年典禮威儀盛一代衣冠意氣豪
中使傳宣捲珠箔日華偏照鬱金袍

卿雲弄彩日重暉一色金沙接翠微
野韭露肥黃鼠出

地椒風軟白翎飛水精殿上開珠扇雲母屏中見
袞衣走馬何人偏醉甚錦鞬賜得海青歸

簫韶九奏南風起沙燕高低撲繡簾醺綠酒多杯迭進
鷓鴣香少火重添舊分宮錦緣衣褊新賜奩珠簇帽簷
日午大官供異味金盤更換水晶鹽

清涼上國勝瑤池四海梯航燕一時豈謂朝廷誇盛大
要同民物樂雍熙當筵受几存周禮拔劍論功識漢儀
此日從官多獻賦何人為誦武公詩

過柳河

野曠山寒露易霜
短榆疎柳路茫茫
雨來黃潦聚成海
風過白沙堆作岡
驛館到時逢數騎
馳車宿處錯群羊
客懷正爾無聊賴
忽見南飛鴈一行

將干嶺

病體朝來正苦寒
驛程又報度將干
出門莫怪山谿險
到嶺不知天地寬
鶴背旋風欺客帽
馬頭飛雪點征鞍
此中自是真仙境
何用吹笙駕玉鸞

金定四庫全書
卷四
榆林有感

老夫白髮已如許山後馳驅動數年正為貧民均馬政
何嫌富戶倍車錢人生要在心無愧物論難齊理自然
欲盡微忠報明主簡書深夜手重編

送上都吳學錄歸河東就試

驅車直渡灤河水千里青山半月程自信文章當世用
人言書劍到家榮上林久已稱司馬宣室終須召賈生
料得鳳池春色滿柳陰立馬共聽鶯

上京和周伯溫御史韻

漢室論功誰最多封侯第一是蕭何從知將相元無種
却笑神仙亦有魔映月蠹魚成脉望倚風飛燕避淘河
憑闌欲說行藏事萬里長空碧似磨

輓李千戶

灤陽草色易黃昏忽報將軍號令新落日青山移石壘
陰風白野動邊塵雙弓直挫三千士一劍長先五百人
太史已書忠孝節佇看高塚卧麒麟

榆林道中

兩行官柳夾長隄，縷縷青絲拂面齊。
馬上睡來渾似醉，客中詩就却忘題。
一天煩暑都成雨，百里平沙不作泥。
自笑微臣頻扈從，年年載筆度山溪。

興安道中

萬重山後人行路，五百年前古戰場。
落日枌榆接雞犬，秋風禾黍沒牛羊。
自逢治化躋堯舜，誰論封疆過漢唐。
慚愧小臣無補報，清時白髮許徜徉。

寄王魯川推官

公庭草綠訟聲稀時見雙雙蛺蝶飛
曹吏盡隨衙鼓散
理官獨抱獄書歸
曾同太守行紅旆更與高僧別翠微
近報兩臺多辟薦殿前早晚賜朝衣

送胡斯文辟南臺掾

鳳凰臺下水東流
潮去潮來白石頭
細雨一帆人到岸
清風兩袖客登樓
幕開江上紅蓮日
書寄山中碧樹秋
珍重此行多意氣
繡衣玉節定重游

送倪秀才從學維揚

日日南風吹水立掛帆
搥鼓下舲艘青山落杯亦到岸
明月照書還倚牕文章少年誰第一
才華近日子無雙
綠衣在篋須頻着歲晚還時鶴過江

送孟景章赴廬州判官

先帝初開太禧院一時郎吏盡瓌奇
名高闕下心如鐵
官到淮南鬢已絲月照寒庭空視牖
雲開秋興偶成詩
舊遊天上多相憶早折梅花寄所思

送友人還錢唐

海門飛雪涌潮頭，萬里乘風起壯遊。
隔岸爭呼楊柳渡，到家先買浙江樓。
才高班馬非無賦，世治蘇張似少謀。
賴有玉堂知已在，人生何必定封侯。

送宋仁甫赴池州陰陽教授

北風吹雪路漫漫，萬里荆門客正寒。
自愛青衫同博士，也勝白髮老長安。
城南款段此時別，江上芙蓉到日看。
我亦春來買舟去，九華絕頂望揚瀾。

贈日者范竹友

溪流繞屋綠如苔
箇箇琅玕手自栽
勁節久宜君子號
清懷近為故人開
夜牕風雨驚龍起
秋谷烟霞待鶴來
誰似丹陽袁太守
時時車騎一裴回

送吳師禮赴池州直學

大江西下九華東
古殿重扉鎖學宮
載酒滿船歌白苧
題詩送客憶青楓
蒲蓮歲熟倉箱實
鹿豕秋肥俎豆豐
遙想郡齋多暇日
壺觴時在翠微中

題括蒼潘照磨具慶堂

十年孤客三尺劍七袞雙親萬里家
江上離歌催疊雪山中壽酒酌流霞
登堂白髮同鳩杖繞徑紅顏共鹿車
莫羨飛丹似霜雪括蒼崑畔有松花

送徐復初辟掾南臺

闔閭城外望金陵千里江流一帶青
桃葉風生催客渡杏花雨過別郵亭
黃金臺上書方到采石磯邊酒卻醒
應是紀綱多暇日綠陰清晝坐閒庭

芝庭為吳中靈子文賦

斜闌曲檻護春晴
五色金花照眼明
南極尾低凝瑞采
東吳雲近結華英
封書欲跨青鸞奏
上壽還隨白鹿行
謝氏諸郎才總俊
唯應幼度最知名

送醫士王安重

滿天風露氣蒼蒼
十二臺高桂子香
白兔夜寒分玉白
紅蓮春暖長沙床
上醫名就肱三折
大藥功成視一方
海上謾傳瓜五色
長生元不遠昌陽

贈寫神鏡塘上人歸京口

鶴翎風動碧天涼
寶月新凝百鍊霜
水面散成千種影
波心元只一輪光
玉簪道士來空室
金粟維摩現十方
此去要觀真法相
却收畫本過維揚

別周鍊師雲臺真館

二十八將已僊去
真館有臺名偶同
白鶴千年來故國
青山萬疊起神宮
有時採藥深澗底
無事種花深谷中
昨夜曾携龍虎出
一壇明月滿旗風

送周希元高士歸廬山

萬里江湖第一關，波濤洶涌接廬山。
九華雲度青天闊，五老峯迴白日閒。
鍊藥房中猿候火，散花壇上鶴隨班。
何時倚棹清溪曲，一笑從君覓大還。

送韓執中還錢唐

萬里長江風浪多，拂衣長別意如何。
獻書賈誼非無術，決策揚雄自有科。
羽檄定逢河上捷，畫船還聽越中歌。
何時乞取閒身去，共倚湖亭醉碧荷。

題廬山楊宗卿思永樓

危樓百尺倚匡廬西蜀衣冠幾世居
對客每傾桑落酒傳家猶有草玄書
天寒倚柱招黃鶴日暮憑闌數白魚
萬里岷峨歸未得亂雲飛處正愁予

新蝶

杏樹生香蠹化成向人飛下不勝情
寒辭薄翅猶粘粉暖溢柔鬚始弄晴
燕舞盤中嫌露重鶯歌扇底避風輕
春閨未解南華夢乞與滕王為寫生

月舫為裳鍊師賦

老龍吹浪滿江湖雪兔西飛碧落孤太乙方乘蓮一葉
藥僊還倚樹三珠開牕白露沾瓊佩對酒寒光射玉壺
萬頃秋波看不盡却携靈藥上玄都

送成誼叔應奉分院上京并呈謝敬德學士

太平天子重時巡首詔詞林擢侍臣書載駝車隨劍珮
射從熊館代絲綸片雲忽送麻姑雨五月方開芍藥春
想得班揚才最贍龍山立馬賦詩頻

東呂仲實左丞

十五年前舊供奉一官留滯越王城不因左轄輸公道
誰向南州進老生史學是非從筆削人才輕重在權衡
甘泉奏對歸來晚猶草封章獻治平

送趙國瑞舍人赴澤州同知

太行雲起亂山青馬上風吹別酒醒試論文章惟晉國
還思典禮在虞廷賣刀民化耕春雨佐印官清戴曉星
回首晴霄十萬里大鵬終見徙南溟

送明原道赴南豐判官

日華西轉萬年枝
記得甘泉奏賦歸
佩馬新迎州倅節
緋魚舊賜從臣衣
詩成江驛梅花瘦
酒醒山城蕨菜肥
為謝南豐舊詩友
白鷗春夢繞苔磯

送江西傅與礪赴廣州教授

買得吳船便欲東
更騎羸馬別諸公
文聲久許江西盛
詩律因歸海外工
人羨義陽封介子
客從秦時薦揚雄
五羊城下南風起
茉莉花香荔子紅

彭叔興赴尼山書院長

少年才學動儀曹，旋賜朝衣換鵠袍。
萬水東歸滄海闊，千厓北拱岱山高。
杏花壇近蒸紅雪，楷木林深漲碧濤。
珍重此行多令譽，古來齊魯出英豪。

寄郡士陶公美

問君生事竟何如，亂石溪邊小卜居。
止酒久知揮白墮，論詩今喜到黃初。
天寒門外數株柳，歲晚山東一束書。
賴得西庄頗相近，蒼頭時遣寄雙魚。

天寒落葉滿庭臯此夕思君正鬱陶
百里青山來款段
一庭明月舞豪曹賈生未遇才因大
王祭雖窮氣自高
何事相逢久相別且燒紅蠟醉春醪

輓侯敬文秀才

客裏青燈二十年手書細字動成編
扁舟觸熱方辭館
孤劍橫秋已夢僊山下數椽仍舊屋
溪南半頃足新田
可憐鉅鹿侯芭去誰與揚雄論太玄

采石和劉顯仁即事韻

下水春生巴蜀雪上江人駕武昌船晚風天外三弄笛
落日淮南一簇烟斷岸淺莎行獨鶴危磯倒樹立雙鳶
綵霞又報明朝霽瑟瑟紅光萬縷懸

徐州

白雲天際散如衣四面青山落水涯鑿石空遺唐將廟
連峰猶豎漢臣旗魚龍浪挾黃樓動牛斗星隨碧漢垂
醉倚船牕問河伯濁流何日是清時

冠州

萬里關山鬢易華
冠州橋下御河斜
千門烟冷分榆火
三月春寒見杏花
新水聚船人趁市
順風吹旆客還家
莫憐書劍頻漂泊
擬學東陵老種瓜

送江生還江南

漕河水泮水溶溶
百尺帆開五兩風
戲綵歸人從海上
倚門慈母問遼東
漁罾荻笋灣灣綠
酒旆桃花處處紅
莫向江南久留滯
龍山還有北來鴻

送賈舍人赴廣東宣慰司照磨

五月南風起舳舻番禺曾是趙王居
貔貅萬竈新趨幕
虎豹千門舊直廬
茉莉編籬香旖旎
蔓藤接屋影扶疎
故人畫諾如流水
報政還應得最書

代祀還呈太師

丞相傳宣出紫宸
鶯花萬里浙江春
捷書近已擒豺虎
瑞紀還先慶鳳麟
宇宙經綸歸聖主
山河帶礪屬元臣
幾迴凝睇雲霄上
夜夜三台拱北辰

年來供奉屢遷官
聖主恩同宇宙寬
左部正慚疏吏牘

西曹仍許進儒冠清時有道遭逢易白髮無才補報難
却上船頭望江月天風吹露不勝寒

新州寄馮養素彥明二都水丞

天子時巡猶北駐詞臣將命許南行遠聞都水來新濟
到說分司在鄆城玉節遙知連海潤金函近見報河清
丈夫莫為離愁惜要把文章佐太平

朱仲文編脩還江西諸公分題賦詩為餞予適
同載南歸約至揚子橋分別因為賦此

瓜洲渡口山如浪揚子橋頭水似雲夾岸芙蓉紅旖旎
滿江楊柳綠紛紛一杯酒向今朝別萬里船從此處分
他日重來須艤棹莫教驚散白鷗羣

邳州和劉顯臣韻

吳船蕩漾一毫輕楚客飄零萬里情驟雨挾雲行斷岸
亂山湧浪入孤城黃河風起鷗無侶紫塞春深鴈有程
莫怪仲宣多感慨朝來白髮鏡中生

晚泊邳州

一帶黃河百折灣下邳城外更潺湲烟迷兩岸疑無地
日落中原喜有山法重鹽租嚴犯界官多魚稅倍征關
白頭父老相逢處猶似圯橋授履還

彭城懷古

戲馬臺前擁旆旌三齊纔破到彭城項王帳底猶虞舞
漢祖軍中盡楚聲百二山河功自棄八千弟子勢都傾
月明閒却烏江渡長使英雄恨不平

崔鎮喜邵少監至

使君五月渡黃河白髮依然壯志多且喜掛帆來舊約
何妨釀酒起高歌船頭北斗五更落舵尾南風連夜過
自笑驅馳成底事漪湖閒却釣魚簑

高郵夜泊

薄莫秦郵聚客船孤城三面接水田戍樓月映高低雪
墟市星搖上下天千里綠蕪分曙色萬家紅粟起炊烟
南風忽乞舟人便幅幅蒲帆盡北懸

揚州別幹克莊僉憲

紅日東生綠霧收海風吹客到揚州露分僊掌金盤冷
香動瓊花玉樹秋使者乘驄開大府僊人騎鶴醉高樓
朝來別我垂楊岸珂佩如雲簇水頭

婁家港祠神回寄元臣僉憲子約監郡

焚香海上祠神罷獨駕樓船夜半迴萬里長風催掛帆
一天明月阻登臺繡衣人仰邦侯至玉節官分水部來
咫尺相望不相見白蘋洲渚重裛回

江陰君山次陸子方韻

畫橋垂柳傍官壕夾岸青山擁雪濤楚相丘墟遺石馬
吳王宮殿壓金鰲天迷鴻鴈江流闊風撼魚龍海氣高
此日登臨無限意古今消盡幾英豪

輓汪尚書妻譙國夫人

尚書謝政江南去特許夫人大國封春日上堂尊酒共
歲時環坐綵衣重離鸞忽奏雲中瑟別鶴還歸隴上松
白髮夫君正愁絕空江何處採芙蓉

輓王君佐秀才

十里青山宅一區平生甘分隱樵漁
新詩自寫因求序故篋常隨為教書
杖屨在門人去遠壺觴掛壁客來疎
白雲滿地松陰冷孤鶴時時守墓廬

和楊德章僉憲詠物詩

僊子初裁蜀錦裳玉壺清映內家粧
一百五日花尚好三十六宮春正長
新綠漸生應帶露舊紅微褪為經霜
自從深院留題後一任東風上下狂

右瓶
中百
日海棠

僊標厭入錦雲鄉却傲冰霜取次芳
銀燭高烧遊太液

紫綳初拂侍明光
春攬杏蒂微生暈
暖漏梅梢欲試粧
不是東君偏耐冷
要將風韻入詩囊

右冬日
海棠

送蜀士史道章訪繁昌張縣尹

上江船裏枕書看
雪浪千堆寄一翰
太白山人元蜀學
繁昌縣令只儒冠
渚花對酒公庭晚
沙草憐衣客路寒
携得琅玕滿歸袖
謝公堂在碧雲端

送赴試春官

水落沙痕寄岸齊
冬深無雪薺生泥
遙知上馬徐州北

且看開船句水西待詔門開金轡裹榮恩燕賜玉偏提
若將文字追時好萬里雲霄自有梯

送內官棄職買書歸蜀立三賢祠

內官買書三十萬從此聲名天下知正為身輕歸印早
不妨船重到家遲客非杜甫依嚴日人是文翁化蜀時
愧我無由能載酒敲門頻問子雲奇

輓陳公輔縣尹

短衣垂脰寄遺孤自立聲名重里閭座上鼎彝前代器

篋中經史外家書
縣花春老初封印
庭藥秋慵久廢耰
惆悵冰壺清絕處
露寒應是泣蟾蜍

峨眉山

霧作衣裳雲作屏
玻璃萬頃著娉婷
望夫石上偏多雨
織女河邊欲墮星
蟬螬夏涼收淺絳
蟾蜍秋冷抹長青
可憐天際微顰處
六代興亡一夢醒

詠姚氏瑞蓮

雨洗瑤池六月涼
侍兒初試錦雲囊
花開雙鳳迷歌扇

子綴羣蜂背密房波淨忽成溪女匹露寒却笑月娥孀
合歡帳底鴛鴦夢臂枕猶聯玉雪香

題丁元善鍊師陽明樓

賀老家西百尺樓好山多處稱僊遊丹光散作霞千縷
劍氣吹成月一鉤牕外鶴歸遼海暮袖中龍起鑑湖秋
道人久直黃金殿可使歸來雪滿頭

謝季衡上人惠松花湯餅

雲門寺裏青松樹五月南風花正香膜粉輕披魚子白

藥珠重綴蜜脾黃餅和甘露曾分送湯合僊霞更共嘗
慚愧老僧多意氣一杯毛骨盡清涼

送國子掌儀魏居仁還山東

京國相逢二十年當時綠髮盡華顛升堂獻贄吾居後
立館司儀子在先夜雨溪聲連客枕夕陽山色滿歸船
古來齊魯多奇士側耳聲名起日邊

贈淵上人住涇縣延壽寺

半生辛苦住城西脩竹滿園蔬滿畦正愛閒雲依疊嶂

忽隨流水度三溪
藤花院靜禪初定
槲葉村深路欲迷
此去莫憐知己少
青山到處好留題

登會稽寶林寺塔

百尺浮圖東海上
晴天目力見秋毫
莫愁風露衣裳薄
且喜雲霄步武高
屋角長松來鶴背
城頭荒草落鴻毛
闌干倚遍心猶壯
更待持杯酌雪濤

送山陰賈縣尹

公吏呼籌催坐衙
朝朝下馬事如麻
三年作宦惟飲水

萬里還朝先過家
賈傳席前因獻策
潘郎縣裡只栽花
江船明日西興渡
兩岸青山白鴈斜

和王繼學憲使玉泉觀魚韻

一方寒玉浸泠泠
天上雲開影倒青
卓錫黃龍曾聽法
撫闌赭鯉亦通靈
明珠碎逐涼風散
濕翠空圍月露零
此日使君行樂處
一時民俗自清寧

陪僕少監海脩撰飲西湖

十年不到西湖上
此日重來意倍親
尊酒暫陪天上使

畫船猶待水邊人題詩香清箋花舊度曲聲傳玉樹新
歸醉小樓明月曙開元鐘鼓正朝真

送外兄李學父

鵲鳩涼雨睡偏宜正是敲門下馬時萬里風塵從戍早
十年江海到家遲書將使節真行錦春上萊衣欲繡絲
且買樓船醉雙玉紅蓮白藕滿西池

送醫士張景遠歸太平之黃池

秋塘雨白水平堤有客撐船繫屋西司馬賦多方病渴

葛洪丹熟尚封泥滿階花落惟金鳳開戶香來是木犀
昨夜月明天似水櫓聲不覺過龍谿

劉山驛

開牕坐看千峯頂對酒還思萬里程飛雨遠隨松子落
濕雲近向樹頭生正愁絕壁鳥鳶背忽聽半空雞犬聲
安得身騎遼海鶴徧遊八極醉吹笙

出大橫道中

朝來數騎嶺頭過忽見青山障白波候吏報來先擊鼓

販鮮船至盡吹螺南邊泊久烟塵少天上恩深雨露多
料得祝釐還報日春風楊柳滿官河

武夷道中

蒼龍飛起崖中斷九曲溪流直上天駕壑舟船遺故物
幔亭簫管會真僊大王巖上雲初散玉女門前月正圓
醉裡櫂歌聲未已忽看孤鶴下翩翩

贈漳南巡檢許以衷

將軍早獻安邊策手挽強弓起七閩正為功名輕萬里

已知勇畧冠千人風鳴鼓角山村曉日射旌旗海戍春
匹馬何時渡江水笑談為國掃妖氛

懷安縣別莊嘉監憲

荔支食罷龍眼熟此日閩南使者過得俸莫嫌三月少
買舟已覺一時多盟鷗狎舞迎歸櫂別騎驕嘶動佩珂
酒醒青天明月上思君迢遞奈愁何

建寧得宣州家書

江上千戈猶未息此身何處可偷安居民戰死終無援

主將逃生竟被殘已報老妻來太末尚憐孤姪壽長干
扁舟十日閩溪上恨不身生兩羽翰

題樂逸軒

山下長溪溪上村溪山如畫正當門遣懷詩就題蕉葉
理釣船歸繫柳根問姓不教通郡縣買書只許遺兒孫
相望只是柴桑里何日從君酒一尊

題宋仁甫樂山亭

當陽城外碧嵯峨獨構危亭意若何嵐氣漸來簷角少

水聲偏向石稜多青雲鶴慣荊州舞白雪人傳郢上歌
何事近來真得趣新松十萬在巖阿

建德城西寺

山門東轉步廊深長日禪房占綠陰松逕雨晴添虎跡
竹潭風冷聽龍吟上林久說相如賦故里徒誇季子金
獨坐胡床看明月不知涼露濕衣襟

蘭溪胡仁中家喜雨

赤日行空勢似焚老龍一起雨翻盆芙蕖趁水紅侵岸

擺桺盈疇綠繞門自是風雲當盛會從知天地有深恩
朝來熟睡南牕醒却憶灤陽從至尊

龍公夜捲天河水散作虛空風雨聲豈獨榮華霑潤澤
要令枯槁遂生成藥欄雙蝶凌晨舞草岸群蛙徹夜鳴
造化功神竟無迹披衣默默坐前榮

江山縣

萬山深處開孤縣下馬入門風滿庭雨脚遠垂松澗白
雲陰低覆稻田青已知賣劍人歸野還憶彈琴客在亭

安得寰區皆卓魯最書時復報虞廷

台州留別林希元

三年直閣常懷士萬里乘槎許問津
滄海日華中夜曉赤城霞氣四時春
謝公高卧元非隱陶令歸來豈為貧
白髮清心自多壽更從何處覓仙人

贈天台李鍊師

赤蛟青鳳下晴空家住天台第幾重
歲久松脂成琥珀夜深丹氣出芙蓉
僊童奏簡騎文虎太乙縣旗起毒龍

昨夜從師到天上故山還著白雲封

題天台方氏山亭

赤城霞氣燭天起四面開牕碧樹涼山鳥晝啼深竹裏
溪魚晚近落花旁茯苓酒共僊人飲蛤蜊盤分野老嘗
何日投簪東海去秋風同製芟荷裳

過鴈山

王事驅馳敢厭勞秋風白髮氣猶豪八千餘里行正遠
四十九盤山更高石壁連雲愁鳥道海門飛雪壯鯨濤

同遊賴有孫公子時遺新詩浣鬱陶

建寧道中

雙玉山前溪水流朝來風雨暗灘頭舟穿亂石方停棹
驛傍空巖更近樓江海十年飛野鶴乾坤萬里蕩沙鷗
七閩見說多凋弊莫為蓴鱸動客愁

延平

樓閣近依山上下市橋橫接岸東西四時雲氣浮孤堞
萬壑泉流會一溪道學已同濂洛盛劒光猶與斗牛齊

延平祠下歸來晚獨對寒燈待曉雞

蒜嶺道中

溪雲帖帖雨沈沈頓覺新寒薄暮侵待渡人歸榕葉岸
過山驛候荔支林清游暫作還鄉客白髮難忘報國心
莫哄行囊輕似羽一錢元自重千金

泉州驛別太守僕世玉

老夫欲起猶便睡候吏頻催却治行萬里烟雲隨驥足
五更風雨雜雞聲乾坤笑我應無補江海逢君倍有情

且解金魚沽別酒洛陽橋下正潮平

賦韶州王太守養老園

手種滿園桃李樹東風披拂爛如霞歌催金縷停鳩杖
酒注銀瓶載鹿車白日青春閒衛戟碧溪流水護僊家
使君自是吹簫侶不記菖蒲幾度華

漳州

漳南五縣半溪洞狂獠恃險時縱橫巨蛇吞象出當道
猛虎搏人行近城如何百年漸禮化尚爾兩度煩天兵

頑愚無知固可悼承宣亦合思廉平

玉泉為宜春黃子中賦

銀河迸落青天上盡作山中風雨聲溪岸碧桃千歲在
石田瑤草四時生雲流空洞潛蛟舞月涌潺湲睡鶴驚
幾度秋高環珮冷瓊僊吹笛過蓬瀛

風涇舟中

白髮飄蕭寄短蓬春深杯酒憶曾同落花洲渚鷗迎雨
芳草池塘燕避風烽火此時連海上音書何日到山中

故人別後遙相望
夜夜空隨斗柄東

送汪仲恭往千山

白月團團星斗稀
夜深船去疾如飛
聲傳海角來鴻鴈
光涌潮頭出貝璣
歲晚正當還漢節
天寒誰為寄蘇衣
芙蓉絕頂鑱天綠
何日相從跨鶴歸

和千山孫元寔韻

霜落梧桐葉上銀
秋來白髮似相親
詩工不讓唐人律
政拙空慚漢吏循
誰謂度遼能下士
自因逢掖學驚人

吳淞江上芙蓉老還憶南山佩可紉

和潘叔寬所寄詩韻

一笑行藏似責須誰知白髮事皆殊
蒼龍欲化平津劍老蚌應還合浦珠
蔡女書傳猶四百山公學在未全孤
秋來江海非無志奈此兵塵滿道途

風雨吳江秋漸過別來身世轉蹉跎
滿階金鳳落將少傍水樹雞生尚多
且對清尊歌慷慨莫嫌白髮舞婆娑
欲將功業標銅柱誰是當年馬伏波

感春

會稽東望隔兵塵消息傳來總不真
楊柳傍人青眼舊
梅花笑我白頭新一愁風雨三更夢
萬里乾坤二月春
寂寞心期誰會得獨支筇竹立江濱

吳景文居庭牡丹盛開飲後有感

韶光天遣屬君家猶是東京第一花
金鼎夜寒團絳雪
錦機春暖簇紅霞
倚風忽作纏頭舞
避日還將便面遮
薄暮闌干同醉倚却憐孤客鬢先華

題朱教授送行詩卷

有序

至正十八年冬余自省府退歸西湖之上郡
博士朱君斗瑞來謁出示京師送行詩一卷
讀之則揭學士庫承旨吳大宗師王尚書沂
潘司業迪陳監丞旅胡應奉助劉博士聞馮
助教三奇凡九人去今纔二十年皆已凋謝
無存者為之撫卷歎息因係之詩曰

中朝諸老凋零盡一讀遺詩感慨多
萬里還家猶俎豆

十年為客尚干戈，秋風東海雲帆舉。
春水西湖畫舫過，此去太平應有象。
杏花深處聽絃歌。

用謝元功韻贈劉生庸道還錢唐

綠陰門巷燕遲歸，白日看書見客稀。
自是病多便野服，豈因性僻解朝衣。
諸生載酒臨滄海，獨子開船背落暉。
有約重來莫相遠，好將編簡究精微。

送方舟上人往靈鷲

靈鷲之山出東海，小朶飛來不記年。
佛國夜光珠作闕，

龍宮春冷玉為泉
浮雲不礙游人履
流水還隨釣客船
試問禪師去何處
夜來騎虎上西天

巴陵女子韓希孟貞節

尚書子婦魏王孫
清白傳家節更文
諸將已捐南渡主
孤身猶抗北來軍
血書夜灑巴陵月
烈氣秋橫鄂渚雲
欲弔忠魂無覓處
唯應瑤席從湘君

寄謝丞相康里公

海雲飛盡天如水
夜夜遙瞻北斗高
正愧無才叨末座

忽聞有命轉東曹鵬搏已借扶搖力鯨背終成轉運勞
白髮儒生何以報唯應執筆從夔臯

送胡孟然還錢唐并東周伯溫程以文字文子

貞

老夫移家東海上愛子相從又一春官為閒多知性僻
客因住久見情親諫章行曳尚書履漉酒誰同處士巾
此去故人如問訊一槎將泛越江津

送有亨姪還錢唐

嗣宗諸姪仲容賢客路飄零雪滿顛曾為頌椒留子美
却思戲蠟愛僧虔十年江海三杯酒百里溪山一釣船
何日兵戈得休息敬亭春雨共歸田

錢唐壯觀天下奇昔日繁華曾見之夜月管絃唯鼓角
春風羅綺盡旌旗湖山謾想遊人樂城郭徒增志士悲
今日別離東海上一瓢村酒鬢如絲

題劉生庸道竹林書室圖

劉生讀書竹林下滿耳金石聲琅琅翠陰碎落日當戶

絳帙亂翻風滿床中夜蛟龍神變化清時鸞鳳瑞文章
此君標致誰能寫一幅雲烟墨數行

送朱道夫赴廣西巡檢

將軍慷慨出幽燕又佩刀弓過海邊桂嶺秋回南去鴈
潯江夜泊北來船正憐主印官無事更喜迎親祿有田
萬里若逢天上使好將詩句寄蠻牋

題蘆花被圖

秋深江上白蒙茸野客分來一色同酒醒孤篷卧明月

帳寒老屋不禁風
羽毛乍聚搏空鶴
蹤跡真成踏雪鴻
夜半何人吹鐵笛
夢魂疑在楚江東

次韻李清叔元夕

絳燭燒烟散滿城
九衢車馬似潮聲
山河影轉琉璃薄
陸海光浮菡萏平
蝶睡誤翻歌扇暖
鵲驚疑報畫簷晴
夜闌人靜天如水
依舊殘星數點明

玩齋集卷四